

քաղաքական նպատակ ունէր: Հակառակ դէպքում, նախ՝ ծածկագրերը նամակում միանգամայն աւելորդ էին. երկրորդ՝ եթէ խնդիրը դուռ կրօնական մերձեցման վերաբերուէր — ինչպէս հաւատացնում է Հ. Չամչեանը — հարկ չկար ամենեւին դանդատուելու, թէ իրենց ձեռքերը ամփոփուած են եւ լեզուները փակ արտաքին եւ ներքին թշնամիների երկիւղից:

Ի հարկէ, Աբգարը վերջ ի վերջոյ հասնում է Հոռով, յանձնում է կաթողիկոսի նամակն ու նուէրները եւ իր առաքելութիւնը բաց անում Պապի առջեւ: Պապը առաջարկում է նըրան՝ դրել մի համառօտ տեղեկադիր հայոց եկեղեցու դաւանութեան եւ ծէսերի մասին: Աբգարը դրում է իր ընկերների հետ միասին եւ ներկայացնում Պապին: Սակայն արդիւնքը նորից ոչինչ: Պապերը ոչ տրամադրութիւն եւ ոչ էլ ժամանակ ունէին հայոց մասին մտածելու: Բարենորոգչական շարժման կողմից սպառնացող վտանգը ամբողջովին կլանել էր նրանց:

Բայց տարօրինակն այն է, որ հայերի այս բոլոր աղերսանքները վերջ ի վերջոյ յանդեցին այնտեղ, որ Գրիգոր ԺԳ. Պապը յատուկ կոնդակով կարգադրեց Հոռովում հիմնել մի դըպրատուն հայ մանուկների համար, ուր «առաքելական աթոռի ծախքով սնուելով հայ ուշիմ պատանիները եւ ողջամիտ վարդապետութեան ոգով կրթուելով, պիտի վերադառնային հայրենիք եւ հողեպէս մխիթարէին իրենց ազգակիցներին» (Չամչեան, Գ., 527): Ուրիշ խօսքով՝ փոխանակ խնդրուած օգնութիւնը տալու, Հոռովը ծրագրում էր ստեղծել մի հիմնարկութիւն իր անմիջական հսկողութեան ներքոյ, որը պիտի ծառայէր միայն եւ միայն կաթողիկոսութիւնը հայ ժողովրդի ծոցում տարածելու եւ հայոց ազգային եկեղեցին քայքայելու:

Սակայն, անդամ այս չարանպատակ հիմնարկութիւնը դուրս չեկաւ՝ դրամական միջոցների չգոյութեան պատճառով (!): Ամբողջ պատմութիւնը վերջացաւ նրանով, որ «հայ ժողովրդի փրկութեան համար» Հոռովում բացուեց հայոց մի հիւրատուն, իսկ Հայաստանում հայերի ձեռքով կաթողիկոսութիւնը քարոզելու համար սկսեցին հայ մանուկներ ընդունել «հռչակաւոր» «Փրօփականտայու» դպրոցը, որը կաթողիկ մոլեռանդութեան մի օջախ

հանդիսացաւ իր ամբողջ գոյութեան ընթացքում:

Չմտանանք փակագծերի մէջ աւելացնել, որ, եթէ Աբգար դպրի քաղաքական առաքելութիւնը անյաջող անցաւ, բայց յամենայն դէպս նրա Եւրոպա ընկնելը մեծ օգուտ բերեց հայ տպագրութեան գործին: Նրան է պատկանում առաջին հայ տպարանի հիմնադրի պատիւը: Սկզբում նա իր տպարանը հիմնեց Վենետիկում, որը յետագայում փոխադրեց Պոլիս:

7.

Այսքան դառն փորձերից յետոյ՝ հայ քաղաքական մտածողութիւնը այնուամենայնիւ ոչ միայն չի հրաժարւում Հայաստանի անկախութեան դադափարից, ընդհակառակը, աւելի ջերմագին կառչում է նրան: Եւ մենք տեսնում ենք, որ Մտեփան Սայմաստեցու փորձից մէկ դար յետոյ նոյնը կրկնում է եւ ժամանակի կաթողիկոսը՝ Յակովբ Գ. Զուղայեցին — նոյն նպատակով եւ նոյն ճանապարհով:

Դա սպացուցում է մէկ կողմից, որ հայ ժողովրդի դրութիւնը, Յակովբ կաթողիկոսի օրով էլ, շարունակում էր մնալ նոյնը, ինչ որ մէկ դար առաջ. իսկ միւս կողմից՝ որ հայ ժողովուրդը եկել էր մի անխախտ համոզման, այն է՝ որ սեպհական պետութիւն ստեղծելով միայն ինքը կարող է ազատ ապրել:

1678 թ. ամառը Յակովբ Զուղայեցին մի ժողով է գումարում Էջմիածնում: Խորհրդակցութեան առարկան էր՝ հայ ժողովրդի ազատութեան խնդիրը: Ժողովին մասնակցում էին, բացի կաթողիկոսից, եւս 12 հոգի, որոնցից վեցը՝ արքեպիսկոպոսներ, իսկ մնացած վեցը՝ աշխարհական իշխաններ եւ մելիքներ, Հայաստանի զանազան վայրերից — ինչպէս վկայում է Իսրայէլ Օրին, որը եթէ անձամբ ներկայ էլ չի եղել այդ ժողովում, բայց նրա կողմից ուղարկուած պատգամաւորութեան մէկ անդամն էր: Իր մէկ ցուցմունքի մէջ, յիշատակելով այդ ժողովի մասին, նա պարզորոշ կերպով տալիս է եւ նրա կազմը, — «Հայոց Պատրիարքը, 12 հայ զլխաւորներ, Երեւանի բնակիչներ, ինչպէս եւ զանազան հայկական քաղաքներից» (Եղեան, «Պոստոս Մեծի յարաբեր.», փաստաթուղթ, թիւ 44):

Յատկապէս մենք շեշտում ենք, այն փաս-